



झजलपा वाह्यो

JWOJALAPA WEEKLY

दैं ७ ल्याः ४१ (पूर्णडक १४३) ने. सं. ११३७ तछलागा दशमि आइतवाः २०७४ जेठ २१ गते आइतवार (Jun- 04, 2017)

मू ८ १- पृष्ठ ६

हाकूगु न्हि हनेम्वाःगु हे खतला ?

किपू नगरपालिका धुंकाः यें महानगरपालिकाय् नं नेवाः भाय्यात मान्यता

थनि भिंच्यादै न्ह्यः किपूया भाषिक कार्यकर्तात जक मखु स्वनिगःया फुक्क हे भाषिक कार्यकर्तात सतकय् क्वहां वःगु खः । अबले संयुक्त भाषा संघर्ष समिति नीस्वना किपूमित नापं फुक्क धाइथें नेवाःत सतकय् क्वहां वःगु खः । थनिं १८ दैं न्ह्यः यें महानगरपालिकां, राजविराज नगरपालिकां व धनुषा जिल्ला विकास समितिपाखें मातृभाषायात थःथःगु लागाय् नेपाली भाषाया लिसेलिसें थप अधिकारया भाषा कथं यें महानगरपालिकाय् नेपालभाषा, राजविराज नगरपालिका व धनुषा जिल्ला विकास समितिइ मैथिली भाषायात स्थानीय भाषा कथं मान्यता ब्यूगु विरुद्ध सर्वोच्च अदालतं २०५६ जेष्ठ १८ गते च्वंगु न्यायाधीश निम्ह कृष्णजंग रायमाझी व टोपबहादुर सिंहया मंकाः इजलासं थुकथं ब्यूगु मान्यता खारेज याःगु खः । उगु न्हिनिसें दैय् दसं जेष्ठ १८ गतेया न्हियात नेवाः समुदायपाखें हाकूगु न्हि कथं न्यायेकाः वयाच्वंगु खः ।

भाषिक अधिकारया दमनया विरुद्ध एकल भाषाया नीतिया विरुद्ध न्यायेकाः वयाच्वंगु हाकूगु न्हि पाय्छि थौं १८ दैं लिपा थुगुसी वंगु जेष्ठ १८ गते सुनानं हाकूगु न्हि न्यायेकेगु ज्याभ्वः तःगु मदु । सम्भवतः १८ दैं न्ह्यः भीसं गुगु निकायपाखें भाषिक समानताया नितिं अधिकार फनगु खः । थुगुसी स्थानीय तहया निर्वाचन धुनेवं हे न्हापांगु बोर्ड बैठकं किपू नगरपालिकाय् नेपालभाषायात कामकाजी भाषाया रुपय् मान्यता विइगु निर्णय याःगु खःसा अनं लिपा यें महानगरपालिकाया बोर्ड बैठकं नं यें महानगरपालिकाय् नं नेपालभाषायात सरकारी कामकाजया भाषाया रुपय् मान्यता बिउगु खः । उगु निकाय यें महानगरपालिका व किपू नगर पालिकापाखें नेपालभाषायात नेपाली भाषा सरह स्थानीय निकायलय् मान्यता बियाः छ्यलाबुलाय् हयेगु घोषणा याःगुलिं थुगु कथंया हाकूगु न्हि हनेगु ज्याभ्वः मयाःगु खः ला धकाः मनूतय्सं न्ह्यसः तयाहःगु दु । तर उकिया लिसः धाःसा आः तक सुनानं बिउगु खने मदुनि । उकिया अर्थ स्थानीय निकायसं नेपालभाषायात नं स्थानीय निकायसं छ्यले फइगु अवस्था दुगुलिं हे हाकूगु न्हि हनेगु ज्या मयाःगु खः धकाः स्पष्ट याना बिउगु दु । अथे हे यल महानगरपालिकाय् न्हापा हे नेपालभाषायात नं सरकारी कामकाजया भाषाया रुपय् मान्यता



१८दैं न्ह्यः नेवाः भाय् स्थानीय निकायसं छ्यले दयेमाःगु मागयाना जूगु आन्दोलनया छगू लू

बिया तये धुंकागु दुसा खप नगरपालिकाय् धाःसा अधिकारीक रुपं निर्णय मयाःसां नेपालभाषायात मान्यता विइगु ज्या जुयाच्वंगु दु व्यवहारीक रुपं धकाः धाःगु दु । शंखरापुर नगरपालिकाय् नेवाः भाय् नं तामाड भाय्यात नं मान्यता विइगु धयाच्वंगु दु । न्हूहूगु नगरपालिकाय् नं नेपालभाषायात सरकारी कामकाजया भाषाया रुपय् मान्यता विइत स्थानीय नेवाःतय्सं दबाव विइगु सुरु यानाहःगु दु । नेवाः मुखपिन्त धाःसा स्थानीय निकायसं अथे नेपालभाषायात मान्यता बियाहःगुलिं कपाः स्याःगु दु । समाजिक सञ्जालनिसें संचार माध्यमय् तकं उकिया विरोध यायेगु सुरु यानाहःगु दु । थुगु खँय् नेवाःतय्सं वाः चायेकेमाःगु अवस्था दु । १८ दैं न्ह्यः नेवाःतसं भाषिक अधिकारया नितिं याःगु थुगु माग म्हगः बुधवाः यें महानगरपालिकां नेपालभाषायात स्थानीय भाषाया मान्यता बियाः छ्यलाबुलाय् हयेगु निर्णय यायेवं नीतिगत कथं भीगु माग पूर्वगु दु । अथे खयां नं सर्वोच्च अदालतं याःगु निर्णयया विरुद्ध नेवाःतसं न्ह्याकूगु थुगु संघर्ष इतिहासय् सदां ल्यनाच्वनि ।

इनाप

ज्यापु समुदायया प्रतिस्थित व्यक्तित्वतय्गु सफू पिकाय्गु नितिं क्वय् न्ह्यथनाकथंया विधाय् दुथ्याःपिं व्यक्तिपिसं थःथःगु बायोदाता (C.V) इलय् हे बियादीत इनाप यानाच्वना ।

१. मन्त्री, २. समासद ३. राजदूत, वाणिज्यदुत, कन्सुलर, ४. पि.एच.डि.डाक्टर ५. एम.बि.वि.एस डाक्टर, बि.ई नर्सिंग, डेन्टिस्ट, फर्मासेप्ट, ६. बि.ई. इन्जिनियर, ७. प्राध्यापक क) स्कूल (माष्टर डिग्री) ख) विश्वविद्यालय ग) चार्टर्ड एकाउन्टेन्ट, लेखा परिक्षक (माष्टर डिग्री) ९. न्यायाधीश सिनियर अधिवक्ता, १०. पाइलट, ११. सेकेण्ड क्लास अफिसर, नेपाल सरकार व वित्तिय संघ संस्थानया क) जि.एम. ख) सि.ई.ओ, ग) सेकेण्ड क्लास अफिसर, १२. फाइन आर्ट, १३. कलाकार, १४. खेलाडी १५. उच्चपदय् च्वना समाजसेवा, १६. उच्चपदय् च्वनाः विभिन्न विधाय् ज्याय् धुंकूपिं

स्वापूया निति
नजरराम महर्जन
निखासी, न्हूबजाः, किपू-१०
फोन नं. ९८४१४०१०७७

भाजु/मयजु

व्वना-पौ

त्वमि रामभक्त महर्जन "रामभक्त" या स्वतःगु नेवाः तये DVD तयेताः

"कुलिचिने"

लोककवि राजभाइ जकमि जू या मू पाहांसुइ पितव्वज्या लिसें जनकवि दुर्गालाल श्रेष्ठ, संगीतकमि गुज्ये मालाकार व त्वमि हना ज्याभ्वःसं मनतयेक भायादीत व्वना त्वना ।

ज्याभ्वः
धारः तंगल मा. विद्यालय
किपू नं. किपू
डिरेक्टराः ने. सं. ११३७ तछलागाः पारु शनिवाः (२०७४ जेठ २७ गते) इ. पाय्छि १२ः ३० ता ईलय

हना
गोलन महर्जन
मिलन स्टूडियो, किपू
९८४६६१९६२/९८४६१३४४१६

व्वनह
ज्यापु महागुथि
किपू नगर समिति

नापं तुच्या ज्याभ्वः



ज्वजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

जनप्रतिनिधिपिन्सं थ:त जनताया सेवक ताय्के मा:

वंगु वैशाख ३१ गते न्हापांगु चरणया चुनाव क्वचाल । भरतपुर बाहेक मेथाय न्यकन मत ल्याखाय क्वचायका चुनावय त्या:पिन्सं पदभार ग्रहण नं याये धुकल । फलाना पार्टी थुलि मेयर, उपमेयर पदय त्याकल, फलाना पार्टी थ्वम्ह जक मेयर उपमेयर त्याकेफत । फलाना पार्टी अप्व: मेयर पद त्या:गुलि एक नम्बर पार्टी जुल, फलाना पार्टी निगूगु थासय फलाना पार्टी स्वगूगु थासय लात धका: वयवय जुयाच्वंगु दु ।

चुनाव ल्वायत चुनाव चिं माल, छगू पार्टीया चुनाव चिं कया: मतदातापिन्थाय मत फ्वंवन । दकलय अप्व: ह:म्ह मनू त्यात । फुक्क थासय नं त्यानाव:पिन्सं थ:गु पार्टीया समर्थकतयगु जक मतं त्या:गु मखु, मेमेगु पार्टी व निरपक्ष मतदातापिनिगु मतनं कया: त्या:गु धइगु खँ ल्वमके मज्यू । चुनावय त्याना वयव हे पार्टीया घोषणा पत्रकथं य:य:थे निर्णय यायेगु यानाह:गु दु । गुकिं याना छगू निगू खँय सरकार खबरदार नं यायेमा:गु अवस्था व:गु दु । थ:गु घोषणा पत्र कथं छवसित लयतायगु निंति मेपिन्त मर्का जुइगु निर्णय यायेमज्यू ।

चुनाव ल्वायवलय छगू पार्टीया उम्मेदवार जूसां चुनाव त्यायेधुका जि सकसियां मनू ख: । जिगु ज्या समाजसेवा यायेगु ख: धका: मनय तया: छगू पार्टीया जक खँ न्यनेमज्यू । सकसियां भलाई जुइगु ज्या यायेमा: । बहुदलिय ब्यवस्थाय त्यानाव:म्हसिया मतसिवे वृपिनिगु मत छथाय तया: ल्याखायबले अप्व: दयफु । व फुक्क छप्प जुयावल धा:सा थ:त ज्यायायेत थाकुइफु । उकिं थुकि नं बिचा: यायेमा:गु खनेदु ।

गजल शौरभ शाक्यया

गजल-३२



ग्यात न्हाँ !, सर्गतय न:न्यावलय सुं खुसि बालय, ल:या तं खंवलय सुं । गरीवं तयेमफू स:, थ:त अन्या:जुयानं साहुनं त्यासाया अप्व:, व्याज कावलय सुं । यक्व:खँ सम्हनं, द्वनेय:खँपु गुबलें थ:गु खँ थ:त हे, मछिंका ब्युवलय सुं । न्हापं न्हापला ग्यात, मयजु तसकं हे मतिलां म्हय, थ:यत्थे म्हितुवलय सुं । जीवन घ:मा: छन्हु, थातं च्वंवलय सुं धात्थें नश्वर खनि, देह स्युवलय सुं

नगरपालिकाय नेपालभाषाया प्रयोग बारे



—नजरराम महर्जन

स्थानीय तहया न्हापांगु चरणया चुनाव क्वचाल । नीदँ लिपा स्थानीय तहलय जनप्रतिनिधित दत । चुनावय त्यानाव:पिं मेयरपिन्सं नगरपालिकाय मांभाययात सरकारी कामकाजी भायकथं प्रयोग यायेगु घोषणा यात ।

नेपालभाषायात नगरपालिकाय कामकाजी भायकथं छयलेगु घोषणा यायेगुली किपू नगरपालिकाया मेयर रमेश महर्जन न्हापालात । थुकिं याना: स्वनिग:या नेपालभाषा प्रेमी जनतात लयताल । नेपा:या हरेक तत:धंगु आन्दोलनय किपूया त:धंगु योगदान दु । अथेहे ऐतिहासिक नगरी किपूया मेयर रमेश महर्जन ऐतिहासिक निर्णय यानादिल । गुकियात सकसेनं ताली थानां समर्थन यात ।

किपू नगरपालिकां नेपालभाषायात सरकारी कामकाजया भाषाया मान्यता विइवं यें महानगरपालिकाया मेयर पदय त्यानादिम्ह विद्या सुन्दर शाक्यं नं यें महानगरपालिकाय नं नेपालभाषायात कामकाजी भाषाया रुपय मान्यता विइगु घोषणा यानादिल ।

थुगु घोषणा लिपा नेपालभाषा प्रेमीपिनि दथुइ छगू कथंया तरंगित पैदा जुल । नेकपा एमाले पहिचान विरोधी पार्टीकथं वयवय जुयाच्वंगु ख: । वहे पहिचान विरोधी धा:गु पार्टीया चुनाव चिं कया: त्यानाव:पिं मेयरपिन्सं नेवा:तय पहिचान कथं नाला: नेपालभाषायात सरकारी कामकाजया भाय रुपय मान्यता विउवलय पार्टीया इज्जत दत । एमाले पार्टी पहिचान विरोधी मखु धका: न्हायत:पुइकल । नेपालभाषायात सरकारी मान्यता दयहे मा: धका: स: थ्वयका वयाच्वीपं नेवा:त दंग जुल ।

हरेक दँय जेठ १८ यात हाकुगु दिं कथं हना:वयाच्वीपं नेवा:तसें थुगुसी जेठ १८ य हाकु न्हिं महन । यें महानगर पालिका व किपू नगरपालिकाय नेपालभाषायात मान्यता विल अथे हे बुलुहुं बुलुहुं मेमेगु नगरपालिकाय नं मान्यता वि हे विइ । आ: न्हूगु संविधान वयधुंकल । न्हूगु संविधानकथं निर्वाचित प्रतिनिधिपिन्सं निर्णय याना: लागु यासैलिं आ: जेठ १८ हाकुन्हि हनेगुया औचित्य मन्त धका: सुम्क च्वन ।

जेठ १८ हाकुन्हि छाय हनाच्वन धैगु यक्वसें मस्यून । विशेष याना थौकन्हय नीदँ नीन्दादँ दुपिं ल्याय्महतसें सिइनं मखु । उकिं थन जेठ १८ या

वि.सं.२०५६ साल जेठ १८ गते सोमवार सर्वोच्च अदालतं यें महानगरपालिकाय नेपालभाषा, राजविराज नगरपालिकाय व धनुषा जिविसिय मैथिली भाय छयले दइमखु धका: फैसला न्यंकल । सर्वोच्चया थ्व आदेश विरुद्ध यें आन्दोलन जुल । यक्व मनूतसें ब्वति नं काल । थुकिं उत्साहित जुया नेपालभाषा संघर्ष समितिया आह्वानय २०५६ जेठ ३० गते आइतवा: स्वनिग: बन्द जुल । व बन्द भव्य नक्सां सफल नं जुल ।

इतिहासया बारे छकूचा न्हयथनेगु प्रयास यानागु ख: । थौकन्हय वयवय जुयाच्वंगु स्थानीय तहलय नेपालभाषा छयलेगु निर्णय थपायचकं वयवय छाय जुल ?

स्वनिग: नेवा:तयगु आदिभूमि ख: । थन नेपालभाषायात सरकारी कामकाजया भाषाया मान्यता थुगुसी जक ब्यूगु मखु । २०१५ सालं न उगु ईया येंया नगरप्रमुख जुयादिम्ह प्रयाग राज सिं सुवालया अध्यक्षताय च्वंगु नगर पालिकाया बोर्ड बैठकं नेपालभाषायात कामकाजी भाषाया मान्यता विउगु ख: । उगु इलय गुलितक व भाषा नगर पालिका दुने छयलाबुलाय वल इतिहासया पानाय दु जुइ ।

वि.सं.२०५४ सालं यें महानगर पालिकाय केशव स्थापित मेयर जूवलय २०५४ साल श्रावण १० गते खुन्हु यें महानगरय नेपालभाषायात नं सरकारी कामकाजया रुपय छयलेगु निर्णय यात । थ्वयां लिपा स्व:निगया उवलयाय नगर पालिकात ख्वप, थिमि, यल व किपू यानां न्यागु नगरपालिकां नं वहे निर्णय यात । राजविराज नगरपालिका व धनुषा जिल्ला विकास समितिं अनया स्थानीय भाय मैथिली भाय मछयलेत अन्तिम आदेश जारी यात ।

थ्व निर्णय या:गु खुला हे मनुनिवलय हे थ्व निर्णयया विरुद्ध यज्ञनिधि दाहाल व मेमेपिं मिलय जुया सर्वोच्च अदालतय मुद्दा तया विल । २०४७ सालया न्हूगु संविधानय नेपालय ल्हाइगु फुक्क भाययात राष्ट्रिय भायकथं मान्यता बियात:गु दु । तर व गथे छयलाबुलाय हयेगु धइगु खँय नियमावली दयेके मा:गु मदयकूनिगु जुयाच्वन ।

थ्वहे खँयात आधार कया: २०५४ साल चैत्र ६ गते सर्वोच्च अदालतया न्यायाधीश हरिश्चन्द्र प्रसाद उपाध्यायया सिंगल बेच्च नेपालभाषा व मैथिली भाययें जा:गु स्थानीय व क्षेत्रीय भाय छयले दइमखु धका: निर्णय न्यंकल । थ्व खँया विरोध नेवा:तसें सतकय कुहां वया: थ्वचा थ्वचा मुना: विरोध यात । थ्वचा थ्वचा मुना जक मखु । थ्वयात छगू राष्ट्रव्यापी आन्दोलनया रुपय हिले माल धका: २०५५ साल वैशाख ३ गते येंया प्रदिप्त पुस्तकालय नेपालभाषा प्रेमी जनतां छगू मुँज्या यात । उगु मुँज्यां मल्ल के सुन्दरया नेतृत्वय “नेपालभाषा

संघर्ष समिति” नीस्वन । यें, थायथासय कोण सभा जुल । जुलस जुल ।

वि.सं.२०५६ साल जेठ १८ गते सोमवार सर्वोच्च अदालतं यें महानगर पालिकाय नेपालभाषा, राजविराज नगर पालिकाय व धनुषा जिविसिय मैथिली भाय छयले दइमखु धका: फैसला न्यंकल । सर्वोच्चया थ्व आदेश विरुद्ध यें आन्दोलन जुल । यक्व मनूतसें ब्वति नं काल । थुकिं उत्साहित जुया नेपालभाषा संघर्ष समितिया आह्वानय २०५६ जेठ ३० गते आइतवा: स्वनिग: बन्द जुल । व बन्द भव्य नक्सां सफल नं जुल । तर व नेपाल बन्द ज्याभ्व: लिपा भाषिक आन्दोलन फासफुस जुयावन । अले दँय छक: जेठ १८या दिंयात हाकु न्हिया रुपय हनावयाच्वंगु दु ।

उगु ईया अनुभव यानां स्वनिग:या नेवा:त उलि उत्साहित जुयाच्वंगु मदु । मनय शंकां थाय कयाच्वंगु दु । आ: हे गैर नेवा:तसें फेसबुकय विरोध यायेगु यानां हयधुंकल । इमिसं खँ स्यूसां मस्यू पह: यानां खयभायया पत्सा नेवा: भाय छयलेत्यंगु थें खँ ल्हाना हयधुंकल । यें महानगरपालिका व किपू नगरपालिकाय नेवा: भाय सिबाय मेगु भाय छयले दइमखु धा:गु ला मखु । खयभाय नाप नाप नेवा:भाय नं छयले दइधका: जक निर्णय या:गु ख: ।

न्हूगु संविधान कथं गुगु थासय छु भाययात निगूगु दर्जाया भायकथं मान्यता विइमाली धका: भाषा आयोग हे गठन यानात:गु दु । व भाषा आयोगया म्याद न्यादँ जुइ । व भाषा आयोगया निर्णय वलकि तिति वया सिफारिसया आधारय छयलाबुलाय हयदइ । थ्वहे खँयात आधार कया: आ: हानं सुनानं अदालतय मुद्दा तयाविल धा:सा भाषा आयोगया सिफारिस लिपा जक नेपाल भाषा छयलाबुलाय हयदइ, आ:यात दिका ती धका: फैसला वल धा:सा छु जुइ ? धइगु न्हयस: ब्वलने धुंक्गु दु । खयतला न्हूगु संविधानकथं स्थानीय तहयात भाषा, संस्कृति विकास यायेगु अधिकार बियात:गु दु ।

थुगुसी जेठ १८ यात हाकु न्हिं केवल फेसबुकय जक छम्ह निम्हसें विरोधया स: तया:ह:गु खनेदु । भीसं जेठ १८ यात ल्वमका: छवय मज्यूनि । हानं जेठ १८ लिमथ्वइ धायमफुनि ।

स्वनिगलय् मेयर जुयादीपिं ज्यापुत ग्व:म्ह ख: ? ज्यापुतय्सं धाइ प्यम्ह तर मेयरपिं स्वम्ह जक ज्यापु धायेत तयार



यल महानगरपालिकाया मेयर चिरिबाबु महर्जन



किपू नगरपालिकाया मेयर रमेश महर्जन



गोदावरी नगरपालिकाया मेयर गजेन्द्र महर्जन



खप नगरपालिकाया मेयर सुनिल प्रजापति

ज्वजलपा वा:पौ

मुलुकय् संविधानसभापाखें न्हूगु संविधान जारी याये धुंका: संविधानयात कार्यान्वयन यायेगु, संघीय गणतन्त्रयात संस्थागत यायेगु नितिं धका: प्रमुख दल नापं सरकारं स्थानीय तहया निर्वाचनया व: बियाच्वंगु दु। अथे हे स्थानीय तहया निर्वाचन धुंका: प्रदेशया निर्वाचन नापं केन्द्र अर्थात संघया निर्वाचन नं वइगु माघ महिनया दुने क्वचायेकेमा:गु संवैधानिक बाध्यता दु।

खय्त ला जारी जूगु संविधानय् आदिवासी जनजाति, मधेसी नापं उत्पीडित समुदायपाखें थ:पनिगु अधिकार सुनिश्चित मज्जुगु संविधान कथं चुनाव जुयाच्वंगु दु धका: आपत्ति प्वंकेगु नापं थ:पनिगु मागयात पुरा यायेमा: धका: माग यायेगु ज्या नं याना मच्वंगु धा:सा मखु। अयनं संविधान कथं चुनाव याइगुयात प्रजातान्त्रिक प्रक्रियाया रुपय् नाला राजनीतिक दलत स्थानीय तहया चुनावय् सक्रिय जुयाच्वंगु अवस्था दु।

थ्व हे भूवलय् वंगु वैशाख २१ गते स्थानीय तहया निर्वाचन क्वचाये धुंका: आ: निगूगु चरणया निर्वाचन वइगु असार १४ गते यायेगु सरकारं तयारी या:गु दु।

निगूगु चरणया स्थानीय तहया निर्वाचन छुं ई लिपा जूसां अन्तत: याना हे त्व:तेगु कथंया तयारी प्रमुख राजनीतिक दलया शीर्ष नेतातय्गु नापं सरकारया दु। न्हापांगु चरणय् न्हय्गू प्रदेश मध्ये स्वंगू प्रदेशय् स्थानीय तहया निर्वाचन या:गु ख:सा आ: निगूगु चरणया निर्वाचन प्यंगू प्रदेशय् जुइ।

थुगुसी स्वनिग:या स्थानीय तहया निर्वाचनय् नेवा:त जनप्रतिनिधि कथं मेयरनिसें नगर सदस्यत तकं त्या:गुलिं आ: नेवा: भाय् संस्कृतिनिसें

नेवा: पहिचानया नितिं छुं नं छुं याइ धका: नेवा:तय्सं आशा याइगु नं स्वभाविक हे ख:। अले स्वनिग:या छु छु नगरपालिकाय् नेवा:तय्सं नेतृत्व यात धका: तकं नेवा: समाजय् चर्चा जुयाच्वंगु दु। वडा अध्यक्षनिसें नगर सदस्यत तकं नेवा:त यक्व हे त्या:गु अवस्था दु।

मेयरया ल्याखं स्वयेगु ख:सा यें महानगरपालिका, यल महानगर पालिका, किपू नगरपालिका, शंखरापुर नगरपालिका, खप नगर पालिका, मध्यपुर थिमि नगरपालिका, गोदावरी नगर पालिकाय् व:गु खने दु। नेवा: दुने नं स्वनिगलय् दक्ले अप्व: जनसंख्या दुपिं ज्यापुत मेयर पदय् सु सु वल धका: ज्यापुतय्गु दथुइ नं चर्चा यायेगु ज्या जुयाच्वंगु दु।

ज्यापुतय्सं स्वनिग:या प्यंगू नगरपालिकाय् ज्यापुत मेयरया रुपय् व:गु दु धका: थुइकाच्वंगु दुसां मेयरपिं मध्ये धा:सा स्वम्हेस्यां जक थ:त ज्यापु धायेगु याना वयाच्वंगु दु। यल महानगरपालिकाया मेयर चिरिबाबु महर्जन, किपू नगरपालिकाया मेयर रमेश महर्जन व गोदावरी नगरपालिकाया मेयर गजेन्द्र महर्जन थ: ज्यापु ख: धका: धायेगु याना वयाच्वंगु दु।

अले खप नगरपालिकाया मेयर सुनिल प्रजापति धा:सा थ: ज्यापु धका: स्वीकार यानाच्वंगु अवस्था मदु। ज्यापुतय्सं प्रजापति धाईपिं ज्यापुत धयाच्वंगु दुसा स्वयं सुनिल प्रजापति धा:सा थ: ज्यापु धका: धायेगु यानाच्वंगु मदु। थुगु ल्याखं स्वल धा:सा प्यम्ह ज्यापुत मेयर जुयादीगु जूसां नं थ:त ज्यापु धका: धाईपिं धा:सा स्वम्ह जक मेयर जुयाच्वंगु दु। अले थुगुसीया चुनावं यक्व हे नगर पालिकाय् वडा अध्यक्षनिसें नगर सदस्यत ज्यापुत त्या:गु खने दु। उकिं याना ज्यापुत उत्साहित हे जूगु दु।



नेपालभाषा सफू ब्वज्या

ज्वजलपा वा:पौ

शुक्रवा: व शनिवा: निन्हुयंकं यलय् नेवा: सफू ब्वज्या, यलया न्हूम्ह मेयर चिरिबाबु महर्जनया ल्हातं उलेज्या शुक्रवा: जूगु दु।

किपूया न्याम्हासिमाय् च्वंगु नेपालभाषा एकेदेमिया ग्वसालय् निन्हुयंकं न्ह्याइगु नेवा: सफू ब्वज्या, यल-११३७ शुक्रवा: उलेज्या जूगु दु। यलया ज्यावलाख्यलय् च्वंगु तमक:द्य: (उग्रचण्डी देग:) परिसरय् न्हिनसिया १२ ता इर्लनिसें न्ह्या:गु उगु सफू ब्वज्या शनिवा: तक न्ह्या:गु ख:।

उगु सफू ब्वज्या ज्याभवलय् मूपाहाँ कथं यल महानगरपालिकाया न्हूम्ह जननिर्वाचित प्रमुख चिरिबाबु महर्जन भायादीगु ख:सा वय्कलं रिबन चाना: ज्याभव:या उलेज्या यानादीगु ख:। ज्याभवलय् संस्कृतिविद् शताब्दी पुरुष डा. सत्यमोहन जोशी, यलया न्हूम्ह जननिर्वाचित उपप्रमुख गीता सत्यालपनिगु नं उपस्थिति दूगु ख:। ज्याभवलय् बौद्धधर्म, नेपा:या संस्कृति लिसें विदेशी सफूया तकं ब्वज्या जूगु दु। निन्हुयंकं न्ह्याइगु उगु सफू ब्वज्या सुथय् १० ता ईनिसें सनिलया ६ ता ईतक जूगु जानकारी ग्वसा: खल: नेपालभाषा एकेदेमिं ब्यूगु दु। उगु कथंया सफू ब्वज्याय नेपालभाषा पिदनाच्वंगु सलंस: सफू दुथ्याकूगु ख:सा छयापंया नं व्यवस्था या:गु ख:। अथे सफू ब्वज्या या:गुलिं नेपालभाषाया सफू पिकाइपिन्त व च्वइपिन्त ह:पा: जूगु दु। थगुने नं नेपालभाषा एकदेमिपाखें येंय् उगु हे कथं सफू ब्वज्या या:गु ख:सा थुगुसी यलय् या:गु ख:।



वंगु शुक्रवा: शहिद स्मारक कलेज किपूनं उगु कलेजया व्यवस्थापन समितिया सदस्य किपूया न्हूम्ह मेयर रमेश महर्जन, उपमेयर सरस्वती खड्का व वडा नं.१० या वडाध्यक्ष अमन महर्जन लगायत वडा सदस्यपिन्त होटल हिलसाइड किपूली बघाई व सम्मान या:गु ज्याभव:या छगू लू



मङ्गल माध्यमिक विद्यालयया व्यवस्थापन समितिया नाय: अमन महर्जन की.न.पा.वडा नं १० या वडाध्यक्ष त्या:गु, अथे हे अनया कर्मचारी हरिशरण महर्जन वडा नं.१०या सदस्य व शिक्षक रामेश्वर ी ठकुराठी नागार्जुन न.पा.वडा नं. ९लय् त्या:गु लसताय् भिन्तुना बिया सम्मान या:गुया छगू लू

निराश जुइम्वा:, सत्यया विजय जुइ: राजेन्द्र श्रेष्ठ



संघीय समाजवादी फोरम नेपालया सह-अध्यक्षलिसें नेवा: न्ह्यलुवा: राजेन्द्र श्रेष्ठ क्वचा:गु न्हापांगु चरणया स्थानीय तह चुनावयात कया: प्रतिक्रिया प्वंकादिसें चुनावया लिच्व:यात कया: निराश व हतास जुइमा:गु आवश्यकता मदूगु विचा: प्वंकादीगु दु।

वय्कलं पहिचानया आन्दोलनपाखें फुक्क नेपा:या जनतायात संवैधानिक अधिकार विइगु मुद्दा आ:या राजनीतिइ दक्ले त:धंगु आवश्यकता जूगुलिं

थ्व सत्य छन्हुया दिं विजय जुइगु विश्वास प्वंकादीगु दु।

भाजु श्रेष्ठ निक्व:गु चरणया चुनावय् नं ब्वति कायेगु जानकारी बियादिसें स्थानीय तहया चुनावय् थ:गु पार्टी ब्वति का:गु कारण पार्टीया प्रचार, संगठन व निरन्तर संघर्षया नितिं ख: धका: कनादिसें नयाँशक्तिलिसे जूगु चुनावी तालमेल निक्व:गु चरणया चुनावय् नं कायम हे जुइगु जानकारी बियादिल।

चुनावय् जूगु पराजयया सन्देश पहिचानया आन्दोलन गलत जुया: मखुसे जनतायात थ्व आन्दोलनयात कया: गुलि थुइकेमा:गु उलि थुइके मफूगु, वय्कलं पहिचानया आन्दोलनपाखें फुक्क नेपा:या जनतायात संवैधानिक अधिकार विइगु मुद्दा आ:या राजनीतिइ दक्ले त:धंगु आवश्यकता जूगुलिं

लिसें भाजु श्रेष्ठ संसारय् पृथ्वी गोल ख: धका: सत्य खँ ल्हा:म्ह मनु मृत्युदण्ड फयेमाल । तर, अन्तत: पृथ्वी गोल ख: धका: प्रमाणित जुल, उकिं पहिचानया आन्दोलनया सत्य खँ थुइकेत ई का:सां महिक्क न्ह्यानाच्वने मानिगु स्थिति दनीगु खँ कनादिल।

चुनावय् त्या:पिं सकलसित भिंतुना देछासें वय्कलं गन गुगु जातिया बाहुल्यता दु, उगु आधार य् महानगरपालिका, नगर पालिका, गाउँपालिका इमिगु मातृभाषायात कामकाजया भाषा दयेका: ज्या यायेमा:गु विचा: प्वंकादिसें आ:तक पहिचान आन्दोलन प्राप्त जूगु व ल्त्वनाच्वंगु विषययात न्हूपिं जनप्रतिनिधिपाखें सम्बोधन याना: ज्या याइ धैगु भलसा नं प्वंकादीगु दु।



नेवाः, पोखरा शहर व नेवाः छैं

श्रीकृष्ण महर्जन

नेपाः देशय् गुलि नं ततःधंगु शहरत दु अन नेवाःत दु । छुं नं लागाय् नेवाःतय्सं हे बजारया विकास याना शहर दयेकेगु ज्याय् महत्वपूर्ण भूमिका जुयाच्वंगु दु धकाः सकलसिनं स्वीकार याना वयाच्वंगु हे खँ खः । उकिं शहर नाप नाप नेवाःत स्वानाच्वंगु दइ । अले सहर विकासय् नेवाःतय्गु नेतृत्वदायी भूमिका जुयाच्वंगु दु । देय्या थीथी कथंया बजाः व शहरत मध्ये नमुना जुयाच्वंगु स्वनिगः पिनेया पोखरा शहर नं खः । पोखरा शहर धाये धुनेवं मनुतय्सं तसकं बांलाःगु व पर्यटकीय दृष्टिकोणं अले सर सफाइया दृष्टिकोणं महत्वपूर्णगु शहर कथं नाला वयाच्वंगु दु ।

छगू कथं चीधंगु उपत्यकाया रूपय् नं म्हसीका वयाच्वंगु पोखरा शहर निर्माण, अनया बजाः निर्माणनिसं हरेक विकास निर्माणया ज्याय् तसकं नेवाःतय्गु नेतृत्वदायी भूमिका जुयाच्वंगु खने दु । पोखराया राष्ट्रिय उच्च मावि दयेकेगुनिसं पोखरा सभागृह दयेकेगु, बाल मन्दिर दयेकेगु, पृथ्वीनारायण कलेज दयेकेगु, पोखरा विश्व विद्यालय दयेकेगु नाप सामाजिक सेवाय् तसकं नेवाःतय्गु नेतृत्वदायी भूमिका खने दु ।

पोखराय् नेवाःत वंगु इतिहास

तत्कालिन जुजु सिद्धिन्तरसिंह शाहया इलय् थनि २ सय ७० दँ न्हयः दक्ले न्हापां नेवाःत पोखराय् वंगु खः । अबले पोखरायात शहरया रूपय् विकास यायेगु नितिं स्वनिगलं नेवाःतय्त यंकेगु ज्या जूगु खः । स्वनिगःया निखुखा छेंयापिं थीथी

कथंया ज्या याइपिं नेवाःत अबलेया तत्कालिन अनया जजुं यंकेगु ज्या याःगु खः । विशेष याना खपयापिं अले छुं छुं येंययापिं तसकं यंकूगु खः । नेवाः समुदाय दुने थीथी कथंया ज्या याइपिं दुगु जुया छगू कथं नेवाःत हे राष्ट्र जुयाच्वंगु अवस्थाय् अथे व्यागलं व्यागलं कथंया ज्या याइपिं नेवाःत पोखराय् यंकाः भिमसेन त्वाल्य तःगु खः । व्यागलं व्यागलं सीप दुपिं अले अज्वःगु हे ज्या याइपिं शहर विकासया नितिं माःगु जुया बैद्य, नौ, जोशी, तम्बः, वातजु, पालिखे, विजुक्छे लगायतयापिं पोखराय् यंकाः बजार दयेकेगु ज्या याःगु खः । अबले विशेष याना पोखराया भिमसेन त्वाल्य तःगु खःसा उकिं भिमसेन त्वाः धइगु नेवाःतय्गु थःगु हे त्वाः थें जुयाच्वंगु दु । सन १९६४ तक नं पोखराया जनसंख्या धइगु ८ हजार जक दुगु खः । अबले पोखराया सिमलचौरनिसं सिंहनाथ त्वाः तक जक वस्ती दुगु खः । उकिं नेवाःतय्गु यक्व बसोवास दुगु अले नेवाःतय्सं पोखराय् बजार दयेकेगु ज्या याःगु खने दु ।

नेवाःतय्सं हना वया च्वंगु संस्कृति

स्वनिगलं वपिं नेवाःतय्सं पोखराय् नेवाः संस्कृतियात निरन्तरता विया वयाच्वंगु दु । पोखराया नेवाःतय्सं खपय् हना वयाच्वंगु विस्काः जात्रा न्यायेका वयाच्वंगु दु । अथे हे सापारुया दिनय् खपय् थें हे ताहा मचा पिकायेगु ज्या याना वयाच्वंगु दुसा लिपांगु इलय् वया नेपाल संवत्या न्हूदँ तःजिक हनेगु याना वयाच्वंगु दु । अथे हे फागु नखः हनेगु, भैरवया प्याखं क्यनेगु, माघ जात्रा यायेगु, मंकाः कथं इहिया ज्या यायेगु लगायतया नेवाः संस्कृतियात निरन्तर ता विया वयाच्वंगु दु । नेवाःत छगू हे थासय् च्वना मंकाः कथं संस्कृतिया रूपय् हना वयाच्वंगु दुसा थःगु हे कथंया गुथि



तकं दयेका संचालन याना वयाच्वंगु दु । पोखराय् नेवाःतय्त संगठित यायेगु ज्या नेवाः खलः कास्कीपाखें याना वयाच्वंगु दु । अले नेवाःतय्गु हरेक गतिविधिया नेतृत्वदायी भूमिका म्हितेगुनिसं ग्वहालि यायेगु ज्या नं नेवाः खलकं याना वयाच्वंगु दु ।

नेवाः खलः कास्की

पोखराया नेवाःतय्त संगठित यायेगु नाप नाप नेवाः नुगः ब्वलंकेगु ज्या नेवाः खलः कास्कीपाखें याना वयाच्वंगु दु । थुगु खलःपाखें नेवाःतय्गु हरेक गतिविधि यायेगु, नेवाः भाय्, संस्कृतिया सवालय् प्रशिक्षण विइगुनिसं थीथी कथंया ज्याभूवः याना वयाच्वंगु दु ।

नेवाः खलः कास्कीपाखें नेपाल संवत् १९३९ निसं १९३७ तकं मदिकक हे मिस नेवाः पोखरा याना वयाच्वंगु दु । थुगु खलकं स्वीखुगू कचा खलः दयेका ज्या याना वयाच्वंगु दुसा अथे हे स्वीखूगू मिसा पुचः, नीखुगू ला ल्याय्मह पुचः दयेका तसकं सक्रिय जुया वयाच्वंगु खने दु । नेवाः खलः कास्कीपाखें नेवाःतय्गु नितिं थीथी ज्याभूवः याना वयाच्वंगु दुसा अन नेवाः छैं तसकं दयेकेगु ज्या यानाच्वंगु दु ।

नेवाः छैं

स्वनिगलं पिने नेवाःतय्सं नेवाःतय्गु म्हसीका कथं नेवाः पहःया छैं दयेकेगु ज्या यानाच्वंगुया छगू नमुना खः पोखराया नेवाः छैं । लँ दथुइ हे कलात्मक भिन्दाःया देगः दयेकातःगु दु । पोखराया व हे भिमसेन त्वाल्य नेवाः छैं दयेकेगु ज्या जूगु दु । भिमसेन द्वादश गुथिपाखें भोगाधिकार सहित नेवाः छैं दयेकेगु नितिं नेवाः खलः कास्कीयात वियातःगु पौने ३ रोपनी जग्गाय् नेवाः छैं दयेकेगु ज्या याःगु खः । २०५९ सालनिसं नेवाः छैं दयेकेगु ज्या पोखराय् जूगु खः । २०७१ सालनिसं नेवाः छैं दयेकेगु ज्याय् अझ तिब्रता जुयावःगु खः । नेवाःतय्गु म्हसीका पिब्वइगु कथं नमुनाया रूपय् दयेकूगु नेवाः छैं धइगु दाचि अप्पां हे आकर्षक जुइक दयेकेगु ज्या याःगु दु । दाचि अप्पा तसकं खपं यंकेमाःगु अले छैं दयेकीपिं दकःमिनिसं सिकःमि तसकं खपं हे यंका ज्या याकेगु यानाच्वंगु दु पोखराय् । आः दच्छिया दुने नेवाः छैं दयेकेगु ज्या पूर्वनी धकाः नेवाः खलः कास्कीया नायः अशोक पालिखें कनादीगु दु । स्वत जाःगु नेवाः छेंया छेलिइ खुल्लागु थाय् दयेकातःगु दु । उगु थाय् भव्य नयेगु नितिं जुइ । अथे हे मातनय् छुं नं कथंया सभा समारोह यायेगु नितिं थाय् दयेकातःगु दु । मातनय् नेवाःतय्गु थीथी कथंया गतिविधि यायेगु नितिं चक्कं थाय् दयेकातःगु दु ।

पोखराया भिमसेन त्वाल्य दयेकाच्वंगु कलात्मक व आकर्षक नापं नमुनाया रूपय् दयेकाच्वंगु नेवाः छैं दयेकेगु भूवल्य आः तकया दुने स्वंगू करोड तका ध्यवा खर्च जुइ धुकूगु दुसा आः हाकनं निगू करोड तका खर्च जुइगु अनुमान यानातःगु दु ।

सँभ्याः तसकं खपनिसं यंकल

भिमसेन त्वाल्य दयेकाच्वंगु नेवाः छेंया नितिं दाचि अप्पा व छैं दनीपिं मनूत जक मखु मेमेगु सामान तसकं खपनिसं हे यंकेगु यानाच्वंगु दु । थनि २७० दँ न्हयःया खपया कलात्मका सँभ्याःयात न्याना यंका पोखराया नेवाः छेंय् तयेगु यानातःगु दु । अथे हे

नेवाःतय्सं थःपिनिगु छेंय् छयलातःगु कलात्मक थानिसं मूलखा तसकं खपनिसं हे यंका नेवाः छेंय् तःगु दु । विशेष याना खपय् नेवाःतय्सं दयेकातःगु नेवाः पहःया कलात्मक छैं थें हे जुइक पोखराय् नेवाः छैं दयेकूगु दु । उकिं पोखराया भिमसेन त्वाल्य ध्यनेवं खपया नेवाः छेंत लुमना बइ । अले नेवाः छेंय् दुहां वनागु महसुस जुइ । कलात्मक रुपं दयेकूगु उगु नेवाः छेंय् लः हायाच्वनीगु हिति नं तयातःगु दु । अले थीथी कथंया बुट्टा तसकं क्रियातःगु दु ।

नेवाः म्युजियम

पोखराया भिमसेन त्वाल्य च्वंगु स्वतजाःगु नेवाः छेंया च्वतय् अर्थात तेस्रो तल्लाय् नेवाः संस्कृतिया म्युजियम तयेगु योजना दयेकातःगु दु । नेवाःत बुइ न्हयःनिसं सिइ धुंकाः तसकं याइगु थीथी कथंया संस्कार मचा बू ब्यंकीगु, जा नकीगु, कयता पुजा, इहि, बाद्वा, इहिपा, जक्वनिसं सिथं यंकीगु इलय् तसकं छयलीगु थीथी कथंया सामानयात तया म्युजियमया रूपय् संचालन यायेगु तयारी यानाच्वंगु दु ।

उकियात नेवाः सांस्कृतिक संग्रहालय धायेगु जुइ धकाः स्थानीय मनुतय्सं धाःगु दु । उगु म्युजियमय् नेवाः संस्कृति नाप स्वापू दुगु सामानत पोखराय् चर्चिपाखें जक कया तयेगु मखुसे नेपाःया पूर्व मेचिनिसं महाकालि अले स्वनिगःया नेवाःतपाखें नं कया तयेगु जुइ धकाः नेवाः खलः कास्की धाःगु दु । खलःया नायः अशोक पालिखें देय्न्त्यंका फुकक नेवाःतय्गु ग्वहालि कथं हे उगु म्युजियम संचालन यायेगु अले सुना सुना छु छु सामान विल इमिगु हे नामं तया तयेगु नापं म्युजियम देय्न्त्यंका सकल नेवाःतय्गु हे खः धकाः नाला कायेगु लकस ब्वलंकेगु जुइ धकाः धयादीगु दु । उकिया नितिं देय्न्त्यंका नेवाःतय्सं ग्वहालि यानादी धकाः तसकं वय्कलं आशा यानादीगु दु ।

स्वनिगलं पिने नं नेवाःतय्सं संगठित रुपं न्हयाः वना नेवाः म्हसीका पिब्वयेगु, नेवाः संस्कृतियात निरन्तर ता विइगु, नेवाः भाय्या प्रशिक्षण विइगु, नेवाः संस्कृतियात युवा पुस्तायात लःल्हायेगु नापं नेवाः छैं दनेगु ज्या तसकं यानाच्वंगु नमुनाया ज्या धइगु पोखराय् जुयाच्वंगु खने दु । उकिं पोखराया नेवाःतय्सं यानाच्वंगु ज्या अले अन दयेकाच्वंगु नेवाः छैं दयेकेगु ज्या यानाच्वंगुपाखें स्वनिगः नापं स्वनिगः पिनेच्वपिं मेमेपिं नेवाःतय्सं नं थुइका कायेमाःगु आवश्यकता दु ।



साहित्य उपन्यास – जन्ति न्त्यात

च्वमि– मदन गोपाल प्रधान “क्वा:घासा”

५ प्यव्व:- १

खजा क्लासय् वना: मचातय्त स्यनेगु श्रीयात छुं न्हूगु खँ मखु। स्कूलय् दँ नं दँ स्यने धुंकूम्ह खः। स्यने ज्यायात लजगायारुपय् मका:सां ई छ्छ्याये खतंया नापनाप निगः प्यंग:सां कमाय् याये धुंकूम्ह नं खः। स्यने ज्याय् क्वराम्ह मखुसां थौं श्रीया भुयुच:ति जक पिहाँ मवः।

क्लासय् वने न्त्य:हे श्रीयात भतिचा गथ्खेसे च्वंगु, म्ह सुख मदुगुलिं मखु, स्यने ज्या त्व:तुगु त:दँ दयेधुंकुगुलिं। हानं छक्रलं क्याम्पस तगिमय् च्वपिं विद्यार्थीतय् दथुइ दं वनेमा:गुलिं थ:हे भतिचा ग्यात। तर गथ्खेसे गिथ्खेसेयात छ्छे ध्याकुनय् तया: क्लासय् वन। थ:यात छम्ह सक्षमम्ह शिक्षकया रुपय् न्त्यबया वहे अनुरुपं स्यने ज्या यात। वयागु थ:गु दक्षता व व्यक्तित्वया हुनिं मचातय्त प्रभावित याये फत। वये त्यंगु भुयुच:ति दुसुके फत। न्हापांगु क्लासय् हे मचातयगु नुगलय् थ:म्हं थाय् काये फुगुलिं वं गौरव तायेकल। क्याम्पसय् स्यनेगु ज्या वया लागि थौं न्हापांया दिं ख:सां थौं हे छम्ह अनुभवि शिक्षकया रुपय् विद्यार्थीतय् दथुइ वं थ:यात व्वये सफल जूगुलिं श्रीया ख्वालय् लसतां भये ब्यू। मचायेक वया मनय जाया व:गु आत्मविश्वास भय् बिया: च्वंगु बांलाक हे वया ख्वालं सिइदु।

घण्टी थाय्वं “थौंयात थुलि।” धका: श्री क्लासं पिहाँ वल। तप्यंक अफिसय् वन। थौं यात मेगु क्लास काये म्वाल। रुटिनखतं वं काये मा:गु क्लास काये क्वचाल। डस्टर व त्यं दनिगु चक थासय् तया: वरण्डा पाखे वना: ल्हा: स्यू वन। घौ पलख हे फ्यमतुसे ल्हा: हु हुं अफिसं पिने वन।

श्रीया तान्द्रा हे मेगु। पिज:या वारे खँ न्यसां निसें वया मन थातय् मला:। पिज:या वारे खँ न्यने न्त्य:तक थ: यज्जुया लू न्त्यलुइका: काल्पनिक संसार य् उखे थुखे ब्वया च्वंम्ह श्रीया थ:गुहे विश्वासय् भ्वखाय् ब्वया च्वन। वयागु व कल्पना संसार भ्वखाचं ल्हाना: चिं तक नं लुइके मफयेक दुना वंगु छँ थें जुल। थ:त य:गु मदयेका: च्वने मा:म्ह श्रीया थातय् मला:गु मनं वयात गन वने च्वने जुइका विल।

छँय् कोथा प्वालय् च्वने बलय् ख्व:गु नुग:यात फ्न ही मी चायेके थें जक जुइ भा:पिया गनं पुस्तकालयलय् वनेगु बिचा: यात। ब्वनां लिहाँ वर्सेनिसें छ्छू हे पला: तये मखनिगु पासा सफू कुथि वनेगु बिचा: याना: श्री तप्यंक वंग: जुना: वन।

थ:गु हे पह:या अस्तित्व ब्वयेगु भ्वलय् दुयंगु सामाग्रिं छापेपिया: त:गु व पासा सफू कुथि श्रीया लागि न्हूगु धाये मखु। पिने वना: ब्वं वने न्त्य: अन वये वने याना च्वंम्ह खः। स्वान वा: व: का कां धिकिं नं सफू कुथिइ गहाँ वन, अंगलय् ब्वया त:गु नेपा:मांया सपुततयगु किपा: छपा: छपातये मिखा ब्वयेकु ब्वयेकुं।

ता:हे लिपा खने दयेक: व:म्ह श्रीयात खनां सफू कुथिया लाइब्रेरियन भाजुं खुसि जुया: लसकुस यात। छायधा:सा श्री छम्ह नियमित रुपं वया च्वनिम्ह ब्वंकुमिनं खः। थ:भाय् साहित्य अले संस्कृतिबारे ब्वने न्यने कने सापहे न्त्या:म्ह छम्ह व्यक्ति खः। उमेरं नच्चा हे तिनिसां बुद्धिं ख:म्ह।

“छि जा धायें हे तापा: ख्वा: जुया: च्वन। छ्छू हे पला: त:भा:गु मखु। छाय् अपाय्च्वं माया मारे याना दियागु?” लाइब्रेरियन भाजुं धाल।

“छुया माया मारे याइ?” स्वाये धुंका: ब्यनिगु माया ला माया हे मखु नि। नाप लायेवं दैगु अले नाप मलायेवं मदैगु माया छु धायें हे या माया खैला?” धका: न्हिला ख्वालं धाधां लाकां त्व:ता: श्री दुहाँ वन।

तुयगु भुसां भुना भ्व:लाक लाया: त:गु चक्तिपाखे क्यना: “दिसँ” धका: लाइब्रेरियन भाजुं धासैलि

श्री फ्यतुत। लिक्कसं च्वंगु मेगु चक्ति छपातय् लाइब्रेरियन भाजु नं फ्यतुत।

मुल्क थ्याना: फ्यतुना च्वंगु स्वयेबलय् निम्हं भवय् भवलय् च्वना च्वपिं थें च्वं। तर अमिगु न्त्यनय् भवय् ब्व मखुसे सफू दिकेगु व:चाधंगु डेस्कत दु।

“अं धायें, छिगु सफू पिदन ला?” लाइब्रेरियन भाजुं धाल।

“जिगु सफू?” भचा अचम्म पहलं श्री थ:गु लिसलय् न्त्यस: थन।

“छि हे छक्र: धया दियागु मखुला? नेवा: कासाया वारे सफू च्वयेगु बिचा: याना: च्वना धका:।”

“अं अं, धयागु ला खः। बिचा: याना थें ज्या याये मफया च्वन।”

“छाय् छिंन्ना अबलय् हे धया: दूगु ख: नेगू खुइगु कासाया नांत मुंके धुन धका:। अले छुं छुं कासातय् वारे च्वयेगु सुरु याये धुन धका: नं धयादूगु ख:।”

“सुरुला यानागु नं खः। तर सिधयेके मफया च्वन।”

“अय्सा आसाकुति जुया: च्वंसां छुं पाइमखु?”

“खजा आसा धैगु गतिशिलताया प्रेरणा धाइ। निरासां कयेका: च्वनेगु सिबें आसाया पल्पसा जक त्वयेका च्वने द:सां बां हे ला: ताया। मेगु छिगु बिचा:।”

श्रीया धापूया अर्थ ग्यसुलाक्क हे थूगु पहलं लाइब्रेरियन भाजु मुसुमुसु न्हिलाच्वन। अबलय्हे लाक्क स्वाने स:ताये दत। निम्हेसियां मिखा स्वाने पाखे वन। बाभ्रति वंम्ह मनू छम्ह न्त्यलुइक: वल। लाइब्रेरियन भाजुयात नमस्ते यात। पत्रिका छगू बिचा: वन। पत्रिका थासय् तया: लाइब्रेरियन भाजुं तद्यागु कापि छगू पुइकल। धलपौलय् छात। अले फ्यतुवल।

“पत्रिका मस्वयागु नं ता:हे दत। न्हाच: ह:गु पत्रिका न्हूगु खलायें?” श्रीं धाल।

“खः। स्वयादिइगु?” धाधां लाइब्रेरियन भाजु दन।

“जिं हे काये का।” धया: श्री दने त्यन।

“मखु, मखु, दिसँ।” धका: लाइब्रेरियन भाजु वन। पत्रिकात तया: त:थाय् छक्र: मिखा ब्वयेकल। न्हि पौ व वा पौ निगू स्वंगू पत्रिकात श्रीया न्त्यने तयाविल। थ:म्हं नं छगू स्वत।

श्री व लाइब्रेरियन वाहेक अन मेपिं सुं मदु। इपिं निम्ह नं पत्रिका स्वया च्वंगुलिं पत्रिकाया पौ पूगु स: सिवाये मेगु तायेमदु। गबलें गबलें पिने लैय् साइकलया घण्टी, मोटर साइकल अले मोटरया हर्न न्या: स: नं ताये दु।

गन वने गन वने जुया: पुस्तकालयलय् वंम्ह श्रीया थ्व हे ब्वने थ्व हे ब्वने धयागु खास छुं दुगु मखु। तर पुस्तकालयलय् वर्सेलिं छुं ब्वने स्वये याये मालिगुलिं य:सां मय:सां पत्रिकासां स्वयेगु बिचा: याना: न्त्यने तया ब्यूगु पत्रिकाय् मिखा ब्वयेका च्वन। मिखा ब्वयेका च्वंसां वंगु छुं मखु। खालि तत: र्व:गु आखलं च्वया त:गु समाचारया छय्ं तय्के जक सरररं मिखा च्वयेकल। लाइब्रेरियन भाजुं स्वया च्वंगु पत्रिकाया पौ छपौ पुइकेमला:नि श्रीं पत्रिका छगुलिं स्वये सिध: पहलं क्वय् तया: न्त्यनेसं च्वंगु मेगु पत्रिका कया: स्वत। पत्रिका स्वयेथें याना छक्र: वक: लाइब्रेरियन भाजु पाखे नं मिखा ब्वयेकीगु। उखे लाइब्रेरियन भाजु ख:गु चुल्या डेस्कय् दिका: पा:ल्हा:तिं ख:गु न्यता: फया: पत्रिका स्वयाच्वन। सिध:गु मखु नि। थुखे श्रीया मेगु पत्रिका नं क्वचाये धुंकल। लाइब्रेरियन भाजुं न्त्यने तया: ब्यूगु निगू पत्रिका नं स्वये सिध:गुलिं छु याये छु याये जुया: स्वया: क्वय् त:गु पत्रिकान्तु कया: छक्र: हानं स्वये भनं पत्रिकाया पौ छपौ छपौ याना: पुइका च्वन। पत्रिकाया पौ पूथें वया मननं पुला च्वन, हिला च्वन अले तुलाच्वन।

कथंहं.....

हलिं नेवा: गुथि किपू कचां किपुली या:गु “भिके-ल्ह्वने-न्हूधा: यायेनु”छ्छयों तया चिनाखँ गोष्ठी ब्वंगु चिनाखँ छसिंकथं पिकया वनेगु तातुना थ्व चिनाखँ न्त्यब्वयागु ख:

४३.जि

प्रयागमान प्रधान

न्हूबजा: किपू

मां

छम्ह मां जन्म ब्यूम्ह

छम्ह मां स्थल ब्यूम्ह

मां ला निम्हं मां हे ख:

मां

आख: र्व: छगः जक

मर्म व महत्व गुलि जक

कना: गुलि कने

ब्याख्या गुलि याये

अथाह सर्ग:

अथाह सागर

तर, तर थौं

जन्म ब्यूम्ह

छम्ह मां वृद्धाश्रम

स्थल ब्यूम्ह

छम्ह मां अनाथाश्रम

वृद्धाश्रमय् च्वंम्ह मां

नसा त्वंसाया थात मदु

समाया तिसा मदु

म्हय् वस हुलिहुलि च्वं

म्हुतु सुकुसुकु गं

सेसेकुंगु ख्वालय्

करुणाया निगः मिखा

त्वलहं

आशाया बसा लायाच्वन स्वया:

अनाथाश्रमय् च्वंम्ह

स्थल ब्यूम्ह मांया

हविगत फ्न हे स्यं

वंगु भूखाचं

कुचा(कुचा दया:

नुग:पा चिरि(चिरि बाया:

चल: वना:

सर्वाङ्ग तहस नहस

मस्तय् नयेत्वने मदु

च्वनेत थाय्वाय् मदु

थ्व लू थ्व स्थिति स्वया:

जन्म ब्यूम्ह मांया मन गुलि ख्व: जुइ?

स्थल ब्यूम्ह मांया मन गुलि ख्व: जुइ?

मिहग भीं पुर्खापिन्सं

जन्म ब्यूम्ह मां बैस वना:

बुरि जुइवं

द्य:मनू जुल भा:पा:

जंक्व याना:

छित्तः स्थानीय नेता, उद्घोषक,
वक्ता नापं बांला:म्ह एफ एम
संचालक यायेगु
जिमिगु अभियान
छिगु नितिं मदयेकं मगा:गु

संचार साक्षरता

न्वचू कला

उद्घोषण

एफ एम संचालन

उकिया नितिं छिं सफू न्याना ब्वनादिसँ। छि थः स्वयम हे सक्षम जुयादिसँ।

सफूया नितिं फोन ल्याः ४३३३००७,
९८४१४०१०७७, ९८४१७५२५८३



नागरिक संवाद केन्द्र, किपू नं भिन्तुना पौ लःल्हात



नागरिक संवाद केन्द्र, किपू नं किपू नगरपालिकाया मेयर रमेश महर्जनयात भिन्तुना पौ लःल्हात वंगु जेठ १६ गते नागरिक संवाद केन्द्र किपू नं न्हूम्ह मेयर रमेश महर्जन व उपमेयर सरस्वती खड्का यात भिन्तुना देखायत किपू नगरपालिकाया हल्य छगू ज्याभवःयासँ भिन्तुना विइगु ज्याभवः जुल । प्रयाग मान प्रधान न्ह्याकादीगु उगु ज्याभवलय नागरिक संवाद केन्द्रया म्हासिका व ज्याभवःया उद्देश्यया संयोजक रजनी महर्जन न्ह्यब्वया दल । मेयरयात विइगु पौ वनेज्या भाजु श्रीकृष्ण महर्जन यानादिल । पौ वनेधुंका: संयोजक रजनी महर्जन मेयर रमेश महर्जनयात पौ लःल्हानादिल । पौ लःल्हाना कयादीसँ मेयर रमेश महर्जन किपू नगरपालिकाया नेपालभाषा छयलेगु खँ थः दृढ संकल्प दुगु खँ कनादिल । नेवाःतयगु ऐतिहासिक नगरी नेपालभाषा जक मखु नेवाः संस्कृतिया कथं दुगु बाजागाजाया विकास व उत्थान यायेत नं थः न्ह्याबलें न्ह्यचिलेगु वचं बियादिल । नेपालभाषा नगरपालिकाया छयलाबुलाय वइगु फारामत नेपालभाषा भाय् हिलेगु जिम्मा संवाद केन्द्रयात हे जिम्मा बियादिल ।

उपमेयर सरस्वती खड्का थःम्ह नेपालभाषा थूगु, खँल्हायत भतिचा थाक्याचवंगु खः । आः याकनं हे भाय् सयकेगु वचं बियादिल । स्थानीय भाषा नेपालभाषा व तामांग भाषाया विकासया निती थःम्ह फुगु ग्वाहालि यायेगु वचं बियादिल । थःगु न्वचू तयधुंका प्रा.डा. तुयु बहादुर महर्जन ज्याभवः क्वचायका दल । भिन्तुना पौ थथे दु

हनेबहम्ह मेयर रमेश महर्जनजु, /हनेबहम्ह उपमेयर सरस्वती खड्काजु, नेपाःया संविधान २०७२ सं नेपाः संघीय लोकतान्त्रिक गणतन्त्र कथं प्रत्याभूत यानातः कथं संघीय नेपाःया स्थानिय तह सरकारया २०७४ बैशाख ३१ क्वचाल । उगु निर्वाचनं त्याःपिं हनेबहम्ह मेयर भाजु रमेश महर्जन व हनेबहम्ह उपमेयर मयजु सरस्वती खड्कापित नागरिक संवाद केन्द्रपाखें तःजिक भिन्तुना दु ।

नेपाः देय्या गौरवं जाःगु नेवाः सभ्यता व पहिचानं थौ तक्क नेपाः देय्या इतिहास व सभ्यता कायम यानाचवंगु दु । नेवाः भाय्, लिपा, कला, साहित्य व संस्कृति हलिमय् नेपाःयात म्हासिका बियाचवंगु ज्वःमदुगु पहिचान खः । संयुक्त राष्ट्र संघय् नेवाः मौलिक लिपि रंजना लिपि नेपाःया हे मौलिक लिपिकथं न्ह्यब्वयाः सार्वभौम सदस्य राष्ट्र कथं स्थापित यानातःगु दु । थथे खयाः नं नेवाः समुदाय व नेवाः पहिचानया प्रतिक कथं नेपालभाषा, लिपि, साहित्य, कलायात नेपाः राज्य विभेदपूर्ण व्यवहार यानाचवंगु खः । नेपाःया संविधान प्रदत्त

स्थानिय तह सरकारया निती निर्वाचित मेयर व उपमेयर भाजु मयजुपिसं उगु विभेदपूर्ण नीतियात चीकाः ऐतिहासिक कालनिसं धस्वानाचवंगु नेपाल मण्डल दुनेया ऐतिहासिक नगरी किपू नगरपालिकाया नेपाल भाषायात आधिकारिक भाषा कथं सरकारी ज्याखँय् छयलेगु निर्णय यानादिल, थ्व नेपाःया आदिवासी जनजाति नागरिक कथं नेवाःतयत दयेमाःगु अधिकार मध्ये छगू खः । थुगु ज्वःमदुगु निर्णययात दुनुगलं हनाबना तसँ सकल किपू नगरपालिकाया नागरिकतय प्रतिनिधि संस्थाकथं नागरिक संवाद केन्द्रपाखें यक्व यक्व सुभाय बियाचना । थुगु निर्णयकथं कार्यान्वयन थौया मितिनिसं यानायंकेत नागरिक संवाद केन्द्र इनाप यानागु जुल । किपू नगरया आदिवासी नेवाःतय सभ्यता व पहिचान संरक्षण व संवर्द्धन यायेगु अधिकारय् छुं कथंया पंगः वःगु इलय् स्थानिय तह सरकारयात माःचाःकथं ग्वाहालि व सहकार्य यानावनेया निती नं नागरिक संवाद केन्द्र प्रतिवद्धता प्वकागु जुल । नाप नापं थुगु नगरया सकल नागरिक अधिकार सम्बोधन यानाः वृत्ति विकास व थी थी ज्या खँय् नेवाःतय समानुपातिक समावेशीकथं सहभागी याकेत नं माग यानाचवना । नेपाल भाषायात आधिकारीक भाषाकथं स्थानिय तह सरकारी निकायसं थथे क्वय न्ह्यब्वयागु विषयसं ध्यान आकर्षित याकागु जुल ।

१. नेपाल भाषां थी थी फाराम व विवरण दयेकेगु । माःगु न्यनेकने व ग्वाहालि यायेत नेपाल भाषाया डेस्कया व्यवस्थापन यायेगु व सरकारी ज्या खँ व विवरण थी थी संचार माध्यमपाखें नेपाल भाषां पिकायेगु । २. नगर दुनेया वनेकृतिइ नेपालभाषा विषयया अध्ययन अध्यापनया निती निर्माण यानाः फछिफक्व याकनं पाठ्यक्रम दयेकेया निती सरकारी स्तरं पहल यायेगु । ३. नगर दुनेया थाय् थासय् हिलायंकूगु व तनावंगु मौलिक नेवाः नां हे छयलाःयंकेया निती याकनं हे पहल यायेगु । ४. किपू नगरदुनेया थाय् थासय् हिलायंकूगु व तनावंगु मौलिक नेवाः नां हे छयलाः यंकेया निती याकनं हे पहल यायेगु । थुपिं विषयसं हनेबहमीं मेयर, उपमेयर लगायत याकनं सिबें याकनं यानाः थुगु नगरयात नमूना नगरकथं स्थापित यायेया निती नागरिक संवाद केन्द्र सहकार्य याना वनेकैगु खँय् नं नागरिक संवाद केन्द्र प्रतिवद्ध दुगु खँ व्याकालि छिकपिगु न्यादँया कार्यकाल तःधंक सुथालायेमा धकाः हाकनं छकः नागरिक संवाद केन्द्र लसकुस यासँ भिन्तुना बियाचवना । भिन्तुना ! भिन्तुना !!

नागरिक संवाद केन्द्र

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाचवंगु कीर्तिपुर सन्देश वाःपौ व ज्वज्वलपाः वाःपौया ग्राहक जुइगु निती स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वाःपतिइ छिगू चिनाखँ/बाखँ/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ

सकलसिगु मंकाः सः



ज्वजलपा वाःपौ

ज्याकू: निखासी त्वा: किपू नपा-३ फोन ल्या: ४३३३००७, ९८०८६२६४२० ई-मेल : kirtipur_sandesh@live.com